

# STRUKTUR FOR FAMILIEGUDSTENESTE – TIL INFORMASJON I KYRKJELYDANE IMSLAND, VIKEDAL OG SANDEID

## I. samling

### 1 | Førebuing

Kyrkjerommet kan vera ope ei stund før gudstenesta, med høve til å tenna lys og sitja stille, i ettertanke og bøn.

*Klokkeringing*

Før dei avsluttande tre slaga kan det vera:

*Informasjon om gudstenesta i dag*

Informasjonen blir avslutta med

«Lat oss vera stille for Gud»

eller ei anna formulering som førebur kyrkjelyden til å vera saman for Guds andlet.

*Kort stille*

*Tre klokkeslag*

### 2 | Inngangssalme

Før inngangssalmen kan det vera eit preludium, normalt som forspel til salmen, eller ein korsong.

Det kan vera prosesjon under preludiet/forspelet og/eller inngangssalmen.

Kyrkjelyden står under prosesjonen.

Dersom brød og vin ikkje er sett fram på eit eige bord før gudstenesta, blir dette bore inn i prosesjonen og sett på bordet eller på altaret.

### 3 | Inngangsord

Før dei to første inngangsorda kan liturgen seia: **Kjære kyrkjelyd.**

**L | Nåde vere med dykk og fred frå Gud, vår Far, og Herren Jesus Kristus.**

eller

**L | Vår Herre Jesu Kristi nåde, Guds kjærleik og Den heilage andens samfunn vere med dykk alle.**

eller

L | I namnet åt Faderen og Sonen og Den heilage ande.

## 4 | Samlingsbøn

7

Denne bønna høver særleg godt i gudstenester med mange born. Ei gruppe born kan stå framfor kyrkjelyden og visa teikna. Dei i kyrkjelyden som ønskjer det, kan gjera handrørslene saman med borna.

*Lyfte hender*

ML/L | Kjære Gud, du er hos oss. Tenn ditt lys i oss.

*Hendene i kryss framfor brystet*

ML/L | Kjære Jesus, du går med oss. Lat oss få leva i din fred.

*Hendene mot kvarandre framfor brystet med fingertuppane opp.*

ML/L | Kjære Gud, du ser oss. Ta imot våre tankar og stille bøner.

*Hendene strekte ut framfor brystet med handflatene opp*

ML/L | Kjære Jesus, du tek våre hender i dine. Lei oss på din gode veg.

*Vi held dei som sit ved sida av oss, i handa*

ML/L | Gode heilage Ande, takk for at vi ikkje er åleine. Hjelp oss å sjå kvarandre med kjærleik.

## 5 Lovsong gloria

Salmen «Måne og sol», eventuelt med innleiinga:

L/ML | Syng for Herren, pris hans namn. Forkynn frå dag til dag hans frelse.

eller

L/ML | Ære vere Gud i det høgste  
K | og fred på jorda blant menneske (som) Gud har  
glede i.

4

L/ML | Ære vere Gud i det høgste  
K | og fred på jorda blant menneske (som) Gud har  
glede i.

Vi lovar deg, vi prisar deg, vi tilbed deg, vi  
opphøgjer deg.

ML | Lova vere Gud, vår skapar, vi lovsyng deg med  
jubel.

K | Vi lovar deg, vi prisar deg, vi tilbed deg, vi  
opphøgjer deg.

ML | Lova vere Jesus, vår frelsar, vår pris skal stiga  
opp til deg.

K | Vi lovar deg, vi prisar deg, vi tilbed deg, vi opphøgjer deg.

Eventuelt dåp

## II. ordet

I andre hovudgudstenester enn høgmesse kan det vera to lesingar, eller ei lesing (evangeliet). Då kan ledd 10 Bibelsk Salme / Salme utelatast.

Kyrkjelyden står under evangelielesinga og sit under dei andre lesingane.

## 6 | Evangelium

*Halleluja/Salme*

Evangelielesinga blir innleidd og avslutta med eit hallelujaomkvede eller ein kort salme. Kyrkjelyden står under hallelujaomkvede. Ein kan òg ha evangelieprosesjon. Dersom salme blir brukt, kan ein syngja vers frå salmen både før og etter lesinga. Om ein syng heile salmen før lesinga, kan predikanten lesa evangeliet eller annan preiketekst i samband med preika.

L/ML | Det står skrive i evangeliet etter ...

Kyrkjelyden står under lesinga.  
Lesinga sluttar med:  
L/ML | Slik lyder det heilage evangeliet.

## 7 | Preike

Predikanten preikar til vanleg over evangelieteksten. Når den første eller andre leseteksten er sett opp som preiketekst, kan den teksten lesast her. Forteljingsteksten kan koma i staden for den oppsette preiketeksten.

På høgtidsdagar, og når det elles er ønskjeleg, kan preika ta til med ein kort innleiingsdel før ein les preiketeksten.

I preikedelen kan det i samråd med liturgen leggjast inn aktualiserande, dramatiserande eller aktiviserande innslag som er samordna med innhaldet i preika. Preika kan avsluttast med lovprisinga:

Ære vere Faderen og Sonen og Den heilage ande,  
som var og er og vera skal éin sann Gud frå æve og  
til æve.

Etter preika kan det vera høve til ei stille stund, ein kort salme eller meditatív musikk.

## 8 | Truvedkjening credo

Truvedkjeninga blir sunge eller sagt fram.

Dersom det er dåp i gudstenesta, kan truvedkjeninga utelatast her. Eventuelt kan ein her syngja ein truvedkjeningssalme.

Kyrkjelyden står under truvedkjeninga.

ML/L | Lat oss vedkjennast vår heilage tru.

A | Eg trur på Gud Fader, den allmektige, som skapte himmel og jord.

Eg trur på Jesus Kristus, Guds einborne Son, vår Herre, som vart avla ved Den heilage ande, fødd av Maria møy, pint under Pontius Pilatus, vart krossfest, døydde og vart gravlagd, fór ned til dødsriket, stod opp frå dei døde tredje dagen, fór opp til himmelen, sit ved høgre handa åt Gud, den allmektige Fader, skal koma att derifrå og døma levande og døde.

Eg trur på Den heilage ande, ei heilag, allmenn kyrkje, eit samfunn av dei heilage, forlating for syndene, oppstoda av lekamen og evig liv.

Amen. Den apostoliske truvedkjenninga.

## 9 | Salme

Salmen kan utelatast dersom ein syng truvedkjenninga. Salmen kan syngjast ståande.

## III. forbøn

## 10 | Kunngjeringar

## 11 | Forbøn for kyrkja og verda

Forbøna kan utformast lokalt, eller ein kan bruka ferdig formulerte bøner.

Forbøna bør helst leiast av ein medliturg. Dei enkelte bønneavsnitta kan lesast av fleire.

Kvart bønneavsnitt kan avsluttast med

**Gud, vi bed.**

eller

**Det bed vi deg om, Gud.**

lese eller sunge av den som bed bønneavsnittet, eller forbønnsleiaren, liturgen eller kantor/forsongaren.

Forbøna med lokal utforming kan disponerast etter desse temaområda:

- 1 Folk og nasjonar på jorda.
- 2 Vårt eige land og folk.
- 3 Den verdsvide kyrkja og kyrkja i vårt eige land.
- 4 Vår eigen kyrkjelyd, familiane våre og staden der vi bur.
- 5 Aktuelle hendingar.

Ein bed for aktuelle hendingar i dei temaområda der dei naturleg høyrer heime (1–4), eller i eit eige avsnitt (5).

*Sjå meir utførleg rettleiing om temaområda, modellar for lokalt tilrettelagde forbøner og formulerte forbøner, side 2.45.*

Forbøna kan innleiast med:

**ML/L | Lat oss be for kyrkja og verda.**

*Kyrkjelydssvar*

Etter kvart bønneavsnitt følgjer eit svar frå kyrkjelyden, sunge eller lese. *Sjå side*

2.65.

## 12 | Takkoffer frå kyrkjelyden

Kan ein samla inn her eller under salmen i ledd 19.

Under takkofferet kan det framførast høveleg instrumental- eller vokalmusikk.

Takkofferet kan samlast inn i kyrkjebenkene eller ved at ein går rundt altaret.

Ofringa kan avsluttast med ei kort bøn, til dømes denne:

L | Evige Gud, di er jorda og det som fyller henne. Alt vi eig høyrer deg til. Av ditt eige gjev vi deg attende.

K eller L | Ta imot oss og gåvene våre i Jesu namn. Amen.

## V. sending

### 13 | Salme

Salmen kan flyttast til Postludium/Utgangsprosesjon, ledd 26.

## 14 | Velsigning

Når det gjeld velsigningsord som kan brukast på andre hovudgudstenester enn høgmessa, *sjå side 2.83*.

Velsigninga blir lesen eller sungen.

Kyrkjelyden står under velsigninga.

Velsigninga kan den enkelte ta imot ved å gjera krossteikn.

Innleiing til velsigninga kan vera:

*Lovprising* **benedicamus**

L/ML syng | Lat oss prisa Herren.

K | Gud vere lova. Halleluja. Halleluja. Halleluja.

eller

*Helsing* **salutatio**

L seier eller syng | Herren vere med dykk.

K | Og med deg vere Herren.

eller

L seier | Ta imot velsigninga.

*Velsigning*

L seier eller syng | Herren velsigne deg og vare deg. Herren late sitt andlet lysa over deg og vere deg nådig.

Herren lyfte sitt åsyn på deg og gje deg fred.

K | Amen. Amen. Amen.

*Tre gonger tre bøneslag*

## 15 | Utsending

Dersom kyrkjelyden blir sitjande under det etterfølgjande postludiet, kan utsendingsordet seiast etter postludiet.

L/ML | Lat oss gå i fred,

A | i Jesu Kristi namn.

eller

L/ML | Lat oss gå i fred

A | og tene Herren med glede.

eller

L/ML | Gå i fred.

eller

L/ML | Gå i fred. Ten Herren med glede.

eller eit anna utsendingsord som høver til særpreget for dagen. Det kan eventuelt òg formulerast eigne utsendingssord. *Sjå side 2.84.*

## 16 |

### Postludium/Utgangsprosesjon

Dersom det er utgangsprosesjon, kan kyrkjelyden følgja etter prosesjonen.

I staden for postludium kan kyrkjelyden syngja ein salme medan ein går ut.

Etter gudstenesta kan kyrkjerommet vera ope ei stund, med høve til stille bøn og ettertanke.

Ein kan òg følgja opp det diakonale oppdraget ved utsendinga med

fellesskapssamling, soknebod, anna besøksteneste, forbønsteneste og andre handlingar.